



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tir_yimyim

tir yimyim **TAPAK 3**

Man Utd-i striker Mbeumo
atema £60m bid asü

Ajit Doval-i China Foreign
Minister Wang ajuru



VOL. XXII ISSUE NO. 251 (ADOK 251) DIMAPUR RASEMNÜ (WEDNESDAY) AAMI (JUNE) 25, 2025 ₹ 5.00

Nagaland CM-i Irish aser UAE ambassadors ajuru



Kohima, Aami/June 24 (TYO): Nagaland Chief Minister Dr. Neiphiu Rio-i Mongulbarnü New Delhi nung diplomats tem den senden balala mena liasü.

Social media sapang X nung Dr. Rio-i Ambassador of Ireland to India, Kevin Kelly ajurua tesendaktep akangshitsü aser tangatettep nung kati ka den

yariteptsü asoshi lenmang bushitsü asoshi jembishinüa liasü, ta ashi.

Ano pai UAE Ambassador, Abdunnasser Alshaali den ajurutepa liasü. Dr. Rio-i iba senden amenba nung tajangzük liasü aser arok ajangzüksü asoshi teka amteper inyaksü teimla lir ta lemsatpep.

NCSU-i CS dang terenlok mapa inyakyim osang tejangja meshir

Dimapur, Aami/June 24 (TYO): State nung terenlok mapa inyaksangshi nung tenük yokba tentet ka ama Nagaland Contractors' & Suppliers' Union (NCSU) ajanga Chief Secretary, Government of Nagaland dangi nübur ajangzüksü asoshi terenlok maparen balala inyakba nung metokmeperi aliba indang lemsatapa zülü ka agütsüogo.

NCSU ajanga ashiba agi, PMGSY Package-III kübok state nung 16-cluster projects indang mapa 40 ya Full Depth Reclamation (FDR) technology amshia inyaksüba lir. Work order ya March 21, 2024 nü agütsü aser mapa ya September 2025 (ita 18) nung renemtsüba lir. Ajisüaka tang inyakba yimya nung dang aonungbo mapang shidak nung iba project merenemtsü. Anungji iba project inyakba contractor(s) dang work order nung aliba ama FDR machines amshia mapang shidak nung mapa renemtsü asoshi totuyuba agütsütsü ajungshir, ta NCSU ajanga Chief Secretary dangi züluba nung shia liasü.

Tribal Affair Department nung projects kar nungbo department-i shidakba work order dang sen timba agütsüba NCSU-i bushiteta lir. PMAAGY project kübok village councils nem department-i senotsü agütsüba pela agizüker, saka department-i lemozüksüba sen shilem 20 jungnüa agizükba ngua aoksar, koba ajanga mapa junga meinyakteter, ta NCSU ajanga ashi.

Maneni Tribal Research Institute atema Notice Inviting Tender (NIT) magütsü saka Table Tender nung inyaker, aser ibai Open Tender agütsüba

indang standard procedure den khenyongi balala lir, ta ashi.

NCSU ajangasa School Education Department-i Samagra Shiksha Abhiyan kübok civil works asoshi yimjak nung advertisements mesangdongba indanga tutetja ashi. Ajidang masü, firm ka kisüng nem work order 130 lemozükja lir. Aser iba firm ajanga projects ya 'third part' nem agüja work order nung shia aliba nung kanga aibelenba lir. Item project atema yimjak nung NIT magütsü saka department-i Open Tender melen Table Tender amshi, ta NCSU ajanga ashi.

Tourism Department nung tim masüba mapa inyakba kuli kar NCSU ajanga tutetja ashiba nung, 25th Hornbill Festival amungtsü lia Naga Heritage Village, Kisama nung terenlok maparen kanga kera inyaka aoba atema pelashishia agizüker, ajisüaka sen crore 100 shi jenjang main arena pavilion yanglutsü atema contract agütsüba nung yimya shidak mamshiba angazüka kanga mepelar, ta ashi.

Nüburtem nem NIT memetetdaksüü iba mapa inyakba contractor dang work order makai mapa inyaksü totuyuba agütsüba asoshi süngmanger, ta NCSU ajanga ashi.

Anungji item ajak ya ajanga sorkar department balalai mapa lemozüksüba nung yimya shidak mamshiba ajiteter. Anungji nü office ajanga item inyakyim nung telangzüba tejangja July 20, 2025 tashinung agütsütsü mepishir, aser yamaji meinyakra onoki tapet mera agitsüsa akumtsü, ta NCSU ajangasa Nagaland Chief Secretary dangi züluba nung shia lir.

Terenlok maparen asoshi ali angati tenlatsüla: Minister Paiwang

Dimapur, Aami/June 24 (TYO): Ali tenlar temi 'conditions' dener ali agütsüba ya sorkari project balala mapang shidak nung renemtsü merangba nung tetsükdaksü kumogo, ta Minister, Health and Family Welfare, P. Paiwang Konyak-i ashi.

Viksit Nagaland for Viksit Bharat nung shilem ka ama state tesem balala tanaben semdanga jajaba nung shilem ka ama Mongulbarnü Zunheboto district kübok Satakha nung aliba Community Health Centre semdanga liasü, koba tawa upgrade süa lir.

CHC building semdangba sülen ali tenlar den jembidang, mozüki yanglutsü asoshi ali tenlaba ya meimchir asoshi mapa tajung ka ama züngshitsü ayongzük.

CHC jungjunga yanglutsü asoshi pa tatemtetba lir ta ashi aser ali tenlar aser nüburtem dang amalitep akatsü ayongzük aser CHC ki o jen jungjunga renemba sülen ibai model CHC ka akumtsü, ta pai ashi.

CHC shidak amentetba sülen health workers tema shidak alitsü, ta Minister Paiwang-i ashi.

Pai civil organization lenirtem dang nüburtem CMHIS aser Ayushman Bharat nung tenüng zülüoka nisung ajak angati health care agidaksütsü ajungshia liasü.

Documents shidak maliba mesüra metemsüba pharmacist temi pharmacy lapoka aliba shibangtsüba indang pai nenshia ashi aser ozüng agi melaba ama iba maparen maneni inyaksü, ta pai ashi.

Pai CHC Satakha semdangba temaitsü süngdong ka tema

yutsü.

Minister Paiwang-i PHC Satakha semdanga yangji shiranger tem den sensaksema drug store aser laboratory semdanga liasü.

Kasa mapang pai Zunheboto district nung BJP party workers tem dang India Ato Kilonser indang mangdang "Viksit Nagaland for Viksit Bharat" takok anguba nung shilem agitsü aser sorkar yaritsü ayongzüka liasü.

Minister Paiwang-isa Advisor, Food & Civil Supplies, LMCP, K. T. Sukhalu aser lenirtem den külemi tang teyangludak District Hospital Zunheboto semdanga liasü.

Minister ya meina Department of Health and Family Welfare nungi Secretary, Principal Director aser ketdangsürtem oa liasü.

NSF-i lanurtem nem ILP awareness agütsü tenzükogo

Kohima, Aami/June 24 (TYO): Naga Students' Federation (NSF) Inner Line Regulation Commission (ILRC) ajanga 1873 Bengal Eastern Frontier Regulation nungi agizükba Inner Line Permit (ILP) system nung rangloker lanurtem nem awareness agütsüba sentong Kohima College nung tanü tenzükogo.

Iba sentong ya All Naga College Students' Union (ANCSU) tir Tenyesinlo Bukh lenisüba kübok agi, kong Dr. Theyiseinu Kreditsu ajanga sarasadem aser Kohima College principal ajanga lisopur temeden wazüka ayuba nung ILP inyakyim tongmelang agi lemsatapa liasü.

NSF Vice President Mteisuding-i ILRC tentetba aser nukjidong rasaa shia liasü.

ILRC Chairman Senchumo

Nsn Lotha-i iba sentong nung ILP provisions aser compliance procedures tejangja rateta ashi.

"Asenok ket nung prangbong (ILP) lir, saka aji koma amshitsü asenoki memetet, saka Mizo nunger ama dangar temi kanga junga amshir," ta Lotha-i jangjatsü aser NSF ya state telungi aitba nisungtem anema masü saka state semdangar temi ozüng sülen anidaksüla, ta ashi.

ILP ya tejangraba meyoktepba nungi adokba lir, kong British nungeri Naga nunger sobaliba aser rongsenketzüng wazüka ayutsü asoshi amshi, ta pai ashi.

Anungji Inner Line Permit ya travel document ka dang lir aser mapang tatakzük ka asoshi dang lir, koba mapang liwaba sülen ano mapang matsülangra ILP alirtem state nung alitsü temeden maka

aser inner line zone yutsür aotsüla, ta pai jangjatsü.

Lotha-i lanurtem dang pei tarutsü tia kumzüka ayutsü asoshi timtema nokdakba nung adentsü ayongzüka liasü.

ILRC yagi sorkar den rarapangsena tokteptsü masü saka teka amteper angatettepa inyaksü meranger, ta ashi.

Maneni ILRC Member Secretary Seve R. Vadeo-i iba sentong nung jembidang, "ILP mapa kuma amshitsü asen arok teinyaksü lir aser ILP ya ozüng tejen ka kisüng masü saka Naga nunger lisopur ayak, ali aser rongsenketzüng temeden wazüka ayuba jung ka lir," ta ashi.

Parnoki tarutsü nung ano region ajunga nung iba ama sentong ayongzüka agitsü, ta NSF ajanga ashi.

Kohima nung 5th Regional Catholic Youth Convention alitsü, lanur 2,000 shi adentsü

Kohima, Aami/June 24 (TYO): Kohima nung tawa yanglushia aliba Mary Help of Christians Cathedral nung June 27-30, 2025 anogotem 5th Regional Catholic Youth Convention alitsü aser yangji Northeastern states balala nungi Catholic lanur 2,000 dak tema adentsü imlar.

North Eastern Regional Youth Commission Indian Catholic Youth Movement North-East (NERYC - ICYM NE) ajanga anogo pezü atema "Pilgrims of Hope" omen nung ajemdaker ayongzükba mungdang ayonger ya Nagaland Catholic Youth Movement (NCYM) alitsü aser ibai Catholic Church's Jubilee Year 2025 den lirumedema aser region nung lanurtem tamang, sobaliba aser telungjem benjong ka amai lir.

Bishop of Kohima aser youth movement indang chief patron, Most Rev. Dr. James Thoppil-osangbener den jembidang, Northeast India nung archdioceses asem kübok dioces 15 lir aser Catholic nunger

million 1.5 lir ta ashi.

Oshi, sobaliba aser kin balala süaka region ya ecclesiastical unit ka ama lir aser tang mezüngbuba Kohima nung iba mungdang ayongzükba atema tejak tenteter aser iba ya ajanga region nung lanurtem tamang nung tali akangshitsü, ta pai ashi.

Northeast nung dioceses 15 prong nungi lanur delegates 2,000 dak tema arua adentsü imlar, ta Father Kokto Kurien, Youth Director of the Diocese of Kohima ajanga ashi.

June 27 nü iba mungdang tenzükba mapang procession, nisan asongba, diocesan stalls moatsüba aser Holy Mass alitsü, ta Father John Burman, Regional Youth Director ICYM ajanga ashi.

Sobaliba saya balala ajaga Northeast tribes aser Catholic sobaliba sayutsü.

June 28 nü sentong nung Meghalaya Chief Minister Conrad K. Sangma aser state minister tem adentsü aser iba mungdang nung Archbishop Victor Lyngdoh of Shillong,

Archbishop John Moolachira of Guwahati, aser Bishop Linus Neli, Chairman of the Northeastern Regional Youth Commission (NERYC) amala arogo lenirtem adentsü.

Anogo pezü sentong nung tamangba, lenisüba, social media aser lanurtem tashi indang onüktem nung jembitsü aser lanurtemi temesepeba mozü amshiba indanga jembitsü, ta pai ashi.

Iba senton nung taoba Arunachal Pradesh Chief Minister Nabam Tuki, Nagaland indang Youth Resources and Sports Director Kethosituo Sekhose aser Transport Commissioner Elias Lotha nunger adentsü imlar, ta ashi.

Iba mungdang ya küm asem nung khen amunger aser June 30 nü final Holy Mass agia mungdang indang nisan agizüksü.

Tang yanglushia aliba Mary Help of Christians Cathedral ya Government of India-i India indang 100 official pilgrimage centers ta agizüka aliba rongnung ka lir.

Medziphema, Niuland, Suruhuto nung Dharti Aaba Janbhangidari Abhiyan sentong agiogo



Dharti Aaba Janbhangidari Abhiyan sentong Medziphema sub-division atema City Centre, Medziphema nung agiba noksa nung angur.

Dimapur, Aami/June 24 (TYO): Dharti Aaba Janbhangidari Abhiyan koba linük ajunga nung benoka inyaksangshiba awareness den repsema saturation campaign ka lir, iba sentong ya June 24 nü Medziphema sub-division atema City Centre, Medziphema nung agiogo.

Medical Department, RD/NSRLM, Social Welfare Department, Agriculture, Fisheries, Horticulture, Industries & Commerce, Food and Civil Supplies, District Manager, CSC, LDM aser SCK nunger densema sorkar department balalai iba sentong nung shilem agi, aser scheme balala indang tangazükba agütsüba den tribal tem atema department inyakyimtem indang metetdaksü. Iba sentong agiba mapang Mozü angati lemtsütsü atema help desk-a ka amenokja liasü.

ADC Medziphema, P. James Swu, SDO-Civil, Tsalemla Sangtam, aser EAC Vithwel Kweho nungeri iba camp ya achaayanga liasü.

Camp nung Medziphema

sub-division kübok Bunsang, Molvom, Maova, Sochunuma, Tsephema, Phiphema, Ruzuphema, Pherima aser Medziphema yimtsüng nungi nüburtemi shilem agia liasü.

Awareness aser saturation camp nung HoD, NGO, GB, VCC, VDB, MTC ajak aser Medziphema kübok yimtsüng 32 pronglai shilem agiaogo.

Kasa mapang nung Niuland District Administration-i, Dharti Aaba Abhiyan, Awareness & Benefit Saturation Camp shilem tasembuba June 24 nü Kuhoxu yimtsüng ground nung ayongzüka agiogo, kong Kuhoxu, Hovishe, Hakhizhe aser Hovukhu yimtsüngtemi shilem agia liasü.

Sentong nung EAC Niuland, Vitoka Yephthomi-i iba sentong ayongzüka agiba indang nükjidong metetdaksü. Agriculture, SCK IDAN, Medical, Horticulture aser Veterinary & Animal Husbandry Department temi pei department indang scheme balala indang metetdaksü.

Sentong nung o tatsüka

jembiba mapang Kuhoxu Village Council Chairman Phuhoyi Zhimomi-i, kishizüng tonga service bener arua agütsüba atema district administration aser ken o dak sendaka aliba department ajak dang kanga pelaba lemsatsep.

Maneni Zunheboto district kübok Suruhuto jila nunga June 23 aser 24 nü Dharti Aaba Janbhangidari Abhiyan campaign ayongzüka agiogo.

Iba sentong ya Ministry of Tribal Affairs, Government of India-i ayongzüka sentong ka aser District Administration-i benoka inyakdar.

Chare Block, Tuensang kübok Longkhipeh yimtsüng nunga 4buba Dharti Aaba Abhiyan- Awareness & Saturation camp ayongzüka agiogo. Iba sentong ya EAC Chare, Zerutso den line department balala, bank tem aser post office longjemer ayongzüka liasü.

Iba campaign yagi Longkhipeh, Tongra, Alisopur, Chare, New Chungliymti, Old Tsadang, aser Old Mangakhi ta yimtsüng 7 ayimjema liasü.

Dimapur nung mejangjaba tasü mang ka nguteta lir

Dimapur, Aami/June 24 (TYO): June 23 nü police control room nungi mejangjaba tebur (non local) ka khermahal nung Police point anasa sür aliba osang telephone ajanga agizüka liasü.

Osang dak ajemdaker duty party iba tesemi aritepa ao aser arishi küm 30 nungi 40 tsüngda asütsü ta bilemba mejangjaba tebu ka khermahal nung Police point anasa sür lia nguteta liasü.

Temzüng ozüng kübok tinyaktsü maparen ajak tembanga inyakba sülen

tasü mang ya post -mortem examination/identification atema District Hospital morgue-i benerogo.

Asüsang yagi Blue jean pant & Blue/Yellow grey T-Shirt semer liasü. Pa sentsü tamang aser pa aso 5.5 liasü.

Ken o dak sendakba nung asüsanger kinunger aser medemertem dang Officer-in-charge. West Police Station, Dimapur (Mobile No. 7085055024) den tongteprateptsü mepeshia metetdaksüogo.

Pfutsero nung Advocacy training ayonger

Dimapur, Aami/June 24 (TYO): ADC Pfutsero, Mhalo Humtsoe-i sangdong ka ajanga, cigarettes & other products (prohibition on advertisement and regulations of trades commerce, supply and distribution) Act 2003 dak sendakba nung Advocacy Training ka June 25 nü 11 ako nungi tenzüka ADC, Pfutsero

conference hall nung agitsü ta metetdaksüogo.

Iba training ya law enforcement agency tem atema district tobacco control cell (DTCC), Phek-i ayongzüka lir. Ken o dak sendaka alir ajak dang iba training sentong nung tamakok maludaktsü arua shilem agitsü metetdaksüogo.

Tesophenyu nung 2buba TUN foundation day mungogo

Kohima, Aami/June 23 (TYO): 2buba Tenyimi Union Nagaland (TUN) Foundation Day, Tseminyu district kübok Tesophenyu yimtsüng nung mungogo. Iba sentong ya "Legacy of Unity" omen nung ajemdaker agia liasü.

Tongti o jembia ama sentong nung o jembiba mapang peace activist Niketu Iralu-i, tarutsü Naga lokti tentetji tanü Naga nungertem khuret lir ta ashi.

Paisa, Naga nungertemi lokti ka ama tashi taitba akümtsü aser pei maitsü kümzüka ayutsü atema kati ka nüngdaker ta angatetogo, ta ashi.

Kasa mapang nung MLA Ar. Jwenga Seb-i ashiba agi, TUN nung Angami, Chakhesang, Rengma, Zeliang aser Pochury densema lir aser

iba ya telungjem temaitsü lir.

Sentong nung Ex- minister Nillo Rengma-ia sentepa liba lokti ajungshia liasü.

Nagaland Zeliang People Organization tir Zandi Domta, Pochury Hoho tir Chompa Jurry, Chakhesang Public Organization tir Vezuhii Keyho aser Angami Public Organization tir Theja Vihienuo nungeria sentong nung o tatsütsü jembia liasü.

Iba sentong ya TUN tir Kekhwengulo Lea lenisüba nung agi aser Rengma Hoho tir Er. Tesinlo Semy-i lokti pela agizükba o jembia liasü. Sentong nungsa TUN general secretary Dr. Tumda Newme-i tepela o jembia liasü. 2buba TUN Foundation Day ya Rengma Hoho-i ayongzüka kanga takok ngua agiogo.

I&C dept-i PM Vishwakarma & Udyam Registration indang metetdaksü

Dimapur, Aami/June 24 (TYO): Department of Industries & Commerce-i sangdong ka ajanga, sorkar scheme balala kübok official guideline agütsür aliba dak ajemdaker PM Vishwakarma and Udyam Registration atema application ya angati dang lir ta metetdaksüogo.

PM Vishwakarma, Udyam registration atema application aser tanga MSME dak sendakba scheme tem atema apply asütsü atema kija aser lokti kari teyar agüja iba atema taah agiba indang Department-i angazükogo, ta kasa sangdong ajanga metetdaksü.

Beneficiaries temi pei mulungka nung tangar nungi teyari agitsü kecha tenokdangba mali, saka PM Vishwakarma

mesüra Udyam Registration atema application benokba mapang sorkar tenüng nung shingai taah memeshitsüla.

Nüburtem dang iba amala inyakyim meita atatsü aser temelaba agüja mali sünnung taah meshiba indang pei District Industries Centre nem osang agütsütsü metetdaksüogo.

Item scheme tem kecha tetsükdaksü makai aser sentotsü dak sendakba nung khuret magütsü temsüa alirtem agidaktsütsü atema department bendanga agütsür lir.

Osang tejangjaba agitsü mesüra timtem ajangshibatam indang osang agütsütsü atema Department Helpline No.: 84130 78294 den tongteprateptsü kasa sangdong ajanga metetdaksüogo.

Straightway Hr. Sec. School pur tanela asüngsashi sentong agi



Mokokchung, 24 June (TYO): 22nd & 23rd June, 2025 anogo ananü Straightway Higher Secondary School, Mokokchung pur tanela asüngsashi sentong ka 'Kibuba nung pela-ang' Filipi 4:4 omen dak rangloker temoatsü manung mungogo, ta SHSSM osang ka ajanga metetdaksü.

Iba sentong nung Tsüngrem o jembirtemji - Akangtemüsü

Yaden (Youth Director, MTBA), Imuienba (APCE Sungkamen Baptist Church), Imtiwala Imchen (Mission Coordinator, MTBA), Bendangmenla (Asst. Teacher SHSS), Moajungla (Asst. Teacher SHSS) aser Dr. Aotemshi (Chairman & Founder, SCMC) parnok liasü.

Kaket shisashiba kisüng nung masü, tokolok-shisatsü timlen

aser tanela tsütsü sakuku lirumedema ainba ajanga kaketshir kaji lokti asoshi nükdang akümer ta tangatetba nung Straightway HSS-i kümshi tanela kümzüka dak rangloker iba ama sentong ya ayonga akar. Kaketshir Montessori nungi Class XII tashi iba sentong nung shilem agia tanela renemshiba mapang tajung ka liasü, ta osang ka ajanga metetdaksü.



June 24, 2025 nü Varanasi nung Union Home Minister Amit Shah-i Uttar Pradesh Chief Minister Yogi Adityanath, Uttarakhand Chief Minister Pushkar Singh Dhami, Madhya Pradesh Chief Minister Mohan Yadav aser Chhattisgarh Chief Minister Vishnu Deo Sai nunger den Central Zonal Council senden amendang tangokba noksa nung angur.

IWT agienba atema Bilawal Bhutto Zardari-i India amokmerener

Islamabad/New Delhi, Aami/ June 24 (Agencies): Taoba mapang Pakistan foreign minister, Bilawal Bhutto Zardari-i India-i Indus Waters Treaty (IWT) tezüngzüktep agienba atema India amokmerenogo.

IWT tezüngzüktep kübok tzü temeden magütsüra Pakistan-i telangzüba agütsütsü atema kecha marendaki inyaksü, ta pai metetdaksü.

Pakistan National Assembly nung budget senden nung jembidang Pakistan Peoples Party (PPP) chairman, Bhutto-i, "India atema shimtsü lenmang ana lir- tzü shidak lemsatsüla mesüra onoki ayong

trokprongla nungjagi tzü agitsü," ta metetdaksü.

Taküm April 23 nü Pakistan nungi kiralongrartemi Pahalgam amakba sülen India-i IWT tezüngzüktep agiena liasü.

Bhutto-i, India-i 1960 küm agiba tezüngzüktep agienba ya ozüng alema inyakba lir, ta ashi.

Paisa, linük ka kija melung nung iba tezüngzüktep agientsü atema IWT telatetbatem nung temelaba agüja mali; UN Charter nung tzü nokdangbaji tashiyim amshia inyakba lir, ta ashi. Paisa, India-i maneni IWT tezüngzüktep alema inyakra ibaji ajanga rara adoktsü, ta ashi.

"Onoki rara maginer,

ajisüaka tzü ya raraba hadir ka ama amshira Pakistan-i inyaksüsa akümtsü. Tamalen ama asenoki tang-a India tamakok ngudaktsütsüsa asenok jenjang ka nung lir," ta paisa metetdaksü.

Taoba mapang foreign minister-isa, Pakistan anema inyaksü asoshi India-i tim masüba nung alima sabang balala amshir, ta metetdaksü.

IWT tezüngzüktep kübok India aser Pakistan na ayong trok nungi tzü lemsaa agir. Iba tezüngzüktep kübok India-i Ravi, Beas aser Sutlej ayongtem nungi tzü agir aser Pakistan nem Indus, Jhelum aser Chenab ayongtem lemjükja lir.

Srinagar nung US aser Israel wako asongba atema nisung ana apu

Srinagar, June 24 (Agencies): Hombar ayaterm nung Jammu & Kashmir yimtiba, Srinagar kübok nung Balhama area nung nisung kari United States aser Israel linüktem wako songja liasü, aser iba ya nüburtem rongnung tesünep raksatsütsü nükjidong nung inyakba liasü, ta Srinagar police-i metetdaksü.

Kashmir nung Shia Muslim nungertemi yimjak nung Iran linük pusemba aser yimtenren party temi Israel-i Iran amakba atema Israel aija liasü. Iba sülen Srinagar nung kari

bendangertem wako songtsü.

Srinagar nung United States aser Israel nunger wakotem songtsüba sülen police-i tasa balala amshia bushisüngdang tenzüka liasü.

Bushisüngdangba mapang nung temelung melemini nisung trok pua asüngdangyaba ajanga iba tatalokba nungji nisung asemini shilem agia aliba jangjaa liasü.

Srinagar police-i, US aser Israel nunger wako songtsür nisung asemji Mohsin Ali Dar, Bilal Ahmad Dar aser Amir Ali Dar nunger lir ta jangja, ta metetdaksü.

"Tai tonglokja alir nisung asem rongnung jagi nisung ana puogo aser tang tasembubaji tebushidak," ta police-i metetdaksü.

"Iba ya nüburtem jashidaktsütsü, yimsü telok balala tsüngda tesünep raksatsütsü aser loktiliba anema inyakdaksütsü nükjidong nung inyakba ama züngshir. Ozüng kübok aibelenertem nem temerenshi agütsütsü. District nung yimjung aser tesünep alitsü atema Srinagar Police-i inyaksü," ta police-i metetdaksü.



June 24, 2025 nü New Delhi nung Delhi PWD Minister, Parvesh Sahib Singh Verma-i repranga lia PWD nung inyaktertemi gari lenmang nung tapok atepba noksa nung angur. Mongolbarnü Delhi sorkari yimti tesem balala nung gari lenmangtem nung ongken/tapok yanglushiogo.

India nung Covid-19 agi shiranger-tem aser asürtem ajema kümdar

New Delhi, June 24 (Agencies): Tesüiba ita ka jungnüa India nung coronavirus wara kanga puteta aruba sülen tangbo coronavirus agi shirangertem aser iba tashidak agi asürtem kanga ajema kümdar, ta Mongolbarnü ketdangsertemi metetdaksü.

June 11 nü India nung coronavirus agi teshirangdakpur 7,000 dak tali liasü, ajisüaka tangbo iba tashidak agi teshirangdakpur 4,425 dang kümogo, ta Mongolbarnep Ministry of Health & Family Welfare-i metetdaksü.

Tesüiba ghonda 24 tsüngda iba tashidak agi nisung ka süogo aser taküm küm tenzüker tang tashi nung iba tashidak agi nisung 124 süogo.

Doctor kati, "Covid-19 ya tangbo tesem kar nung dang prokba wara ka kümogo. Iba

wara ya amokmeren tuluka masü. Ibayongji nisung aikati temaitsü liaka metendanger," ta ashi.

"Coronavirus ajanga temang tera dang metar aser nisung aika pei kidang anogo ana-aseem tsüngda anepadoker. Covid agi shirangba dang masü saka cancer, tezüngjang tashidak aser temelungjang ama tanga tashidak-a keta alirtemi dang kanga junga anepalutsü nüngdak," ta pai ashi.

Max Saket nung Internal Medicine Director, Dr Rommel Tickoo-i, "Onoki temang metartem, aketertem aser yimra agi shirangertem ajak dang covid tendangtsü metuyur. Ajisüaka Covid tali prokba ajanga shirangertem karibo tetsübu nung Covid tendangtsü atema onok dangi aruogo," ta metetdaksü.

Ajit Doval-i China Foreign Minister Wang ajuru

New Delhi, June 24 (Agencies): Mongolbarnü National Security Advisor (NSA), Ajit Doval-i China foreign minister, Wang Yi ajurua senden amendang India-China tsüngda tesendaktep asadang aser tenapronglai India-China tesendaktep tsütsü lenla ajak ajungkettsütsü atema inyaksü bangjemogo, ta ketdangsertemi metetdaksü.

20buba SCO Security Council secretaries senden nung adentsü atema tang Ajit Doval China-i oa lir. Wang den senden amendang Doval-i region nung

yimjung atema kiralongra tapu ajak anema raratsüji kanga tongtibang, ta ashi.

India-i Operation Sindoor kübok Pakistan nung kiralongrartem camp aika amakba sülenbo tang mezüng Doval aser Wang na ajurutepa senden menogo.

Union Defence minister Rajnath Singh-ia kobi melii China linük semdanga SCO defence minister tem senden nung adentsü.

Taküm September ita nung Ato kilonser, Narendra Modi-ia China semdangtsü sentong lir.

Alima nung rara azüoktsü atema India-i inyaksüla: Mamata

Kolkata, June 24 (Agencies): West Bengal Chief Minister, Mamata Banerjee-i, alima tesem balala nung rara ajanga tzü-mopung kanga menendaktsür, ta shia lai Centre sorkar dang item rara azüoktsü atema inyakdaksüner, ta mepishi.

Mongolbarnü state assembly nung alima tzü-mopung menenba tebilemtsü onük lemsatepdang lai, "Alima nung rara ajanga yimjung raksatsüba dang masü saka mopung-a menentsür. Alima tesem aika nung rara adokogo aser item ama rara ajanga tzü-mopung menentsür. Itemji nokdangtsü atema asenoki mera agia inyaksüla," ta ashi.

Iran aser Israel na tsüngda drones aser missiles aika amshia raraba ajanga Middle East nung tensa mejungi aliba mapang ka nung Trinamool Congress tongti lenir, Mamata-i iba o jembi.

India Foreign ministry-i yimjung atema ketdangsüa inyaksüla, ta shia lai, "External affairs ministry ya India sorkar kübok lir. Item rara anentsü

atema asenoki yimtenren ajanga inyaksüla," ta takhangba agütsü.

"External affairs aser yimtenren onüktem atema jembitsü asoshi kü nem tashi agüja mali, ajisüaka iba lima nung senso tajung ka ama ni kü tebilembatem lemsateper," ta lai ashi.

Paschim Medinipur district kübok Ghatal sub-division nung tzümetsüng tensa dak sendakba nung Mamata-i, Damodar Valley Corporation (DVC)-i Maithon aser Panchet dams nung jana meindokba agi tang iba tensa ya ajurur, ta aitsü.

Laisa, tzüngluruwa mongpu nung DVC-i state ketdangsertem den mejembitepi Maithon aser Panchet dams nungi tzü tali yokba ajanga tzümetsüng tensa ajurur, ta ashi.

Hombarnü West Bengal Irrigation Minister, Manas Bhuniya-ia, Paschim Medinipur district kübok Ghatal sub-division nung tzümetsüng agi nisung lakh 2 jungnüa kongshiego, aser sorkari akokba tashi parnok yaritsü atema inyakdar, ta metetdaksü.



TIR YIMYIM YIMOBILEM (EDITORIAL)

DIMAPUR WEDNESDAY, JUNE (AAMI) 25, 2025

Tanur asüandang sayuba

Tang Mokokchung town nung Football asaya meimer telok ka tenüing agi 35+ Mokokchung Football League teloki tanurtem arishi küm 9 nungi 14 tashi purtem anidena football asayatsü sayuba sentong ka ayongzüka akaba ya saisapong nung Vision Mokokchung 2040 ataloktsü asoshi tenzüka sentong ka mesüka asütsü, kechiyong item tanurtem ya 2040 küm tashi nungbo alima nung nungtugu football asayar karbosa kümer asen nükla nung parnokji asayaa angur. Aiben asenoki nisung tain kümer külenang mapa inyaksü sayur aser tangazüktsü purtemia tain kümer külenang angazüktsü meranger, iba jagi asenok dak sempet liaka tangar menepa asenoki mangazükteter aser meinyaketer. Aji oda, kechi mapa nung südirsüka tila asüdangyongi kechi koma azüoka inteter, yamaji junga aiener. Ibaji tetenzükdangyongi teyangluri lateta yutsüba alima inyakyim lir. Atangji, benjongbentsü longsutsü atema taintem ayongdener sayisapong nung shilem agibaji balaka, saka asayaba agi tagitsü rongsen dena yangluteta asayatsü asoshibo tanur tila asüdangyongi asayabaji akhi mapang tsüraburtemi tanur tila asüdangyongi alu inyak angazükdaksüba amai lir. Iba amaji asenoki asen tanurtem ya kechi kümdaktsüner, iba amaji akümtsüsa tila tanur asüdangyongi sayutsüla aser jangradaktsütsüla. Aji oda, asayabaji mapa meinyaknüba agi mapang endoka asayaba mapa ka masü saka asayaji mapa akümtsüla aser asaya sayubaji mapa inyak sayur ama bilema sayutsüla aser tangazüktertem nema mapa inyak angazüker amai bilemdakja angazükdaksütsüla. Iba tangatetba nung kodang tanur kati asaya ka asayatsü angazükdir, iba asayaji pa mesüra la asoshi medemer tajungtiba akümtsü. Iba asaya jagi pa mesüra la nungdak ajak bener arutsütsü. Kasaji, asayaba maparentem nung dang masü saka tashitemetet akümtsü asoshi sayuba maparen nunga, tanur tila asüdangyongi kaket azüngtsü yimya sübadaktsütsüla, kechiyong shisatsü ya kaket azüngba ajanga angur. Aji oda, kodang nisung kati kaket ka züngdir, pa mesüra laji kaket zülur dang nung jagi temetetba aser shisatakaba akümer. Tanü asüng balaka tanur kinü asüdangyongi tsüraburtemi kinü tanur nemji kazütsü smart mobile phone amshidaktsür, anungji tanur asüdangyongi mobile reprangertem jagi 'ni kechi inyaksüla?' ta bilemer masü saka tangar kechi inyakdar? aser tangari kechi sayur? ta dang bilema nisungji tain akümer. Ibayongji, tanü asenok football asayartem masü saka tangar football asayaba reprangertem lir. Kasaji, asenok ya mapa inyaka jangratema alirtem masü saka tangar mapa inyaka jangratema aliba reprangertem lir. Aji oda, tangar amang agi sangwa küma inyaker aser asenok tangar mapa inyakbaji amuia moi repranger. Item yimyatemi asenok tanur asüandang yimya sübaba nungi ataloker. Itemji asenoki jungjunga bilemdangra, tangarbo tanur asüdangyongi mapa inyaksü sayur saka asenokbo tangar mapa inyakba reprangtsü sayur. Joko, asenoka Tsüngrem temeim agi shisa tenük terabo lapoka nüchi dangi arur asünungji, asenok nisung shia taküm nung nükjidong tongteta litettsüsa, taküm yangluba mapa ya ajungbena masü saka tila tanur asüdangyongi tenzüksüla. Aji oda, nisung ka taküm nung Tsüngrem meteta aientsü asoshia tila tanur asüdangyongi sarasademtsü sayuba nungi tenzüksü. Kasaji loktiliba nunga wainshin meteta alitsü asoshi sobaliba aser awashi yimya ajak tsüraburtemi tanurtem dang parnok tanur asüdangyongi sayutsüla. Atangji, asenok tsürabur aser taintem asoshi tanurtem dang sayutsübo melamelar amai bilema alitsüa akok, saka tanurtem dang sayutsübaji o agidang masü saka mapa agi dena inyaka sayutsüla, kechiyong tanurtemi parnok dang taintemi kechi ashir ta masü saka kechi koma inyaka sayur ta asübalen süoki taiba ia repranger. Aji oda, asenoki football asayatsü sayu saka asenok taküm yimya nung football asayar memesük litetra, parnokji football asayatsü mejangratsü. Kasaji, asenoki tanurtem kechi kümdaktsünüa sayur, iba amaji asenok alitsübaji tesayuba nung tongtibangtiba teinyaktsü asütsü.

OLEMSABANG

TETSÜR TOBUR TAJUNG TILATEM

~ P.Renthy Jamir

(Yashi adok nungi...)

Tobur ajungba ya onsara tongtibang asünung tanü joko pi bendanger jilu benschia asen lima nunga district level, state level ta ano Miss India, Miss World ta toktepba nung aiürtemi shilem agitsü jangrateper. Ano Aori jembiba o ka Tsüngremi sempet tagütsür ka nemsä agütsür anungji tetsürbo tobur ajunger dak sempet ajak alir. Jembishinü, awashi, yimya tajung inyaksangshi tazü. Tobur majungerbo osü mazü, jembishinü majung, awa ao majung tatepkotsü tesa inyakteter. Yamaji tobur ajungba nüngsangji tsükchir lima tashi oa jembir aser iba ajanga yim o yim na, kin o kin na raratepa aru. Tetsür tobur ajungbaji Tsüngrem sempet ulura saka tobur ajunglatem ajanga nübur dangi aiben lendong timtem bentsür aruba lir. Item tatishitsü kar yangi shisemtsür. Ijip chubatsür Cleopatra tobur onsara tajung asü, lai Roman yimsüsür Julius Ceasar tashi mesüzükteta chuba mendeni atu saka Mark Antony tsübuä lasasa suseta asünung Ijip lima Rom yimli küboki ai. Helen of Troy onsara tobur ajungba agi la raktepdang küm ter tashi raraa Greek aser Trojan nung tasü tait mongin nokinketer ajak iba rara nung sama ta jembir. Juliet tobur onsara junga liaka la taküm tatembang pei meimsang Romeo tenaprongla tenüing entoka menena asütsüsa tiabai bentsür aru. Ottello kinungtsü tobur ajungba nung pai pa taküm ajak yangji ranglokba ajanga pasasa tebuttsü dak mulung malem suseta asü. India nung Sita tobur onsara junga sotetbayong la nüngsang Cylon tonga oa tsükchiri bener ajenba ajanga la atema raradang nübu tajung jenti samar linük nung tesama tulu ajuru. Ano India nungsa Chittor yimli nung Rana Singh kinungtsü Padmini tobur ajungba nüngsang Delhi tashi oa Alaluddin Chubai la rakzüka agitsü mapang talangka nübu jenti lalua rarar Chittor lima tebur ajak samar Padmini anir tetsür ajak mi nung rongseta asütsüsa la tobur ajungba ajanga bener aru.

Ano maneni Muhammed Ghor India ajunga maktoker linük nung takaba rongsen ajak bener aoba otsüji Delhi aser Ajmer chuba Prithviraj Chauhaner jala tobur tajung soteta Kannauj ruler Jaichani mangatettepi bener ajenba ajanga atalokba lendong lir. Ano India nungsa Ranak Devi tobur onsara junga sotetnung Sorath chuba Siddhoraj aser Gujarat chuba Khongar na la raktepdang küm 12 tashi nübur taküm jenti lalua rarar Gujarat chubai Sorath chuba kolak lepzüka bener par jabaso ana tepseta yutsür aodang Ranak Devi iba sülen anitaka oa la tebuba kolak arungdak mi nung pongoka asüandang lai atakatempa ajanga iba tesem nung ayong tulu saka tzü mait takong tanü tashi lir. Item kodanga amatsü makokba tatalokba otsütem ya putusa putu meimchirtemi azüngtsü aser jembitsüsa asüba ya tetsür tobur ajunglatem ajanga bentsür arubatemsa lir.

India tsür tobur tajungtila Pamela Borde la tobur onsara jungaka lai tali mashi la tobur ajung sempet mesenmotoa amshiba ajanga la tetushi khonang agizüka yur ano England Parliament member tashi la ajanga tenüing menük tulu ngua court nung noktaksüsa alima dangi maksü bentsür aruba otsü jembir. Ano Nepal tsür Devyani Rana tobur ajungba dak sendakba nung Nepal chuba chir Dipendrai par tetsü tebu aser tenu nung den anükapang ajunga taküm manglangtemtsüba tatalokba otsü ya-a iba lima nungbo tatalokba otsü tulutiba rongnung ka lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

North aser South Korea Khristantem telongjem sentong ka agi



June 21, 2025 nü South Korea nung Gyeonggi Province kübok Anyang nung aliba Saejoongang Church Tenla kidang North Korea nungi jena arur Khristantem aser South Korean Arogo nung züngsemtem telongjem sentong ka nung Pastor, Cho Bong-hee-i 'Longjemer sarasademba nung tashi lir' onük jembidang tangokba noksa nung angur.

June 24, 2025: North Korea nungi jena arur Khristantem aser South Korean Arogo nung züngsemtem June 21, 2025 nü South Korea nung Gyeonggi Province kübok Anyang nung aliba Saejoongang Church Tenla kidang telongjem sentong ka agiogo.

Khrista osangtajung ajanga tamangertem longjemdaksüba sentong nungji tekülem agiba den külemi sarasadem agia liasü. Iba sentong ya 2025 Pan-Korean Reunification Festival dak sendakba telongjem sentong ka liasü.

North Korea Christian Association Tir, Rev. Seo Kyung-hwa aser Global Mission United Training Center TMTC chair Rev. Hyeon Soo Lim na leniba nung iba sentong ayongzüük.

North Korea nungi ajenba missionary tem aser Khristantemi tanaben longjemer Khrista dak teimla aliba lemsateptsü atema mapang talangka nungi yongyaa sarasadema aruba ama iba sentong atangji agiteta parnok tsüngda ajungshitepa liasü.

"The Road We've Walked," "A New Beginning, A Path of Challenge," aser "The Road of Mission," omentem nung ajemdaker North Korea nungi jena arurtemi taküm kuli lemsatep, jilushi, kentenmenü aser shilem balala ajanga Tsüngrem tenüing asang.

Iba sentong nung tongti o jembirtem rongnung Global Village Church nung Missions pastor Rev. Cho Bong-hee, taoba mapang Korea longjema alidang Minister inyaksang Kim Ha-joong aser tamalen North Korea nung apuba Canada nung pastor, Rev. Hyeon Soo Lim nung liasü.

Okila jembidang North Korea Christian Association chairman aser 2025 Pan-Korean Reunification Festival Tir, Rev. Seo Kyung-hwa-i, "North Korea nungi ajenertemji Tsüngremer yimli nung tamagitsü masü. South Korea nung parnok ya Korea tanaben longjemtsü atema inyakba wadang nung walunirtem lir. Parnoki Arogo aser linük den longjemer Korea longjemtsü atema inyaker," ta

ashi.

Paisa, "Khrista osangtajung nung ajemdaker tanaben longjemtsüji asen nüburtem atema Tsüngremer sentong lir. Asenoki sarasademdi aser longjemer renemdi," ta ayongzüük.

Sentong tetenzüklen Mokdong Global Village Church) nung pastor, Rev. Cho Bong-hee-i Tenyartem mapa 12:5-7 nung ajemdaker, "Ajungben Taochi yimlaang" onük jembia liasü.

Rev. Cho-i, "Tenyartem Mapa mapang nung Herod Agrippa Chubai Arogo reshikangshia liasü. Pai Yakub tepset aser Peter tsüüngden chiokdak puoka ayu. Ajisüaka Arogoi kanga sarasadema liasü," ta ashi.

Paisa, "Akhidang mezüing Arogotemi Peter chioktsü atema kanga sarasademba ama asenokia Khrista osangtajung ajanga Korea tanaben longjemtsü atema kanga sarasademtsüla. Kanga nendaka sarasademba ajanga Herod matsüngdangi ajungbena obendang aru, aser puti otsü mongin Josephus-i ashiba agi, anogo pongu dang lirbo pa 'acute colitis' agi asü," ta metetdaksü.

"Tenyartem Mapa tapu 12 ya longjemer sarasademba nung tashi tulu aliba otsü lir. Asenoki kanga rongdak süa sarasademra aser osangtajung nung ajemdaker tanaben longjemtsü atema mepishira Tsüngremer taochiji ajungbena arutsü. Asenoki bendanga agüja sarasademba ama Tsüngremia mapa inyaksü. Sarasadem ka ajanga tesüngmangtsü ataloker. Asen sarasadem ajanga ajungbena osangtajung ajanga tanaben longjemtsü atema mapa tenzüüksü, ta ni amanger," ta paisa metetdaksü.

Taoba mapang Unification Minister Kim Ha-joong-i pa China nung South Korea nung ambassador inyakba mapang nung pai yaritepa North Korea nungi ajener 1,760 South Korea nung jenokdaksüba lemsatep.

Kim-sa, "1995 küm nungi tenzüka North Korea nungi jena arua China nung alirtem kümzüüksü atema ni anogo shia

ANOGO ABEN TSÜNGREM DEN

Kishi lapokang

Ajiang, Ni kishi züng nung noktaker kishi nung akoshir. Kari kü ola angashir kishi lapokra, ni pa dangi aittsü, aser pa den chiyunga ajemtsü, aser pai kü den chiyunga ajemtsü. (J. Adok 3:20)

Holman Haunt (1827-1910) noksa yanglur nungtugu ka liasü. Pai kenu tesüngmangtsü junga ka noksa tenung agi "Yizü, alima tesangwa" ta yanglu. Noksa nungji aonung Yisui atsüki ka nung nokdaker teka tabeleni milen ka am aser teka techiji-i kishi ka dak akoshla yanglu. Iba noksa ya renemer kulen meshiteta lapoktsü asoshi nisung aika jaten aser kodang noksa shibanga alibaji lapok, ajaki kanga pela agizuk aser kanga junger ta asü. Saka telok nungjagi nisung kati nokdaker asüngdang, "Nai ano mapaji merenem" Noksa yanglusang jagi langzü. "Ajak renemogo" saka nisungba jagi langzü, " kishi nung ki shipangba (knob) maket". Noksa yanglusang jagi langzü, "Iba kishi yabo telung nungi dang lapoktsü akoker, kechiaser ibai meimchir mulung kishi lir". Idangji nisung ajaki kanga shitak ta agizük.

Yisui akoshir nai lapoktsüla. Pai temeim agi ajar, ne mulungjang kishi lapokra Yisui na kümzüüksü, süneptsütsü, ne khuret ajak pai abentsü. Aser Pa den na teti chiyunga jema alitsü. Aji koda tepelatsü ! Anungji menua teli, kishi lapokang.

June 25 anogo ya Nicaragua Arogo atema sarasademtsüba anogo asütsü

June 24, 2025: United States sorkari putirtem, pastor tem, Conference of Catholic nun tem aser Khristan lenirtem Bishops (USCCB)-i, June 25, noklang aika linük nungi Bodhbar anogo ya Nicaragua meindokogo.

nung aliba Arogo atema Taküm küm tetenzüklen sarasademtsüba anogo ka U.S. Commission on asütsü, ta sangdongogo, ta International Religious International Christian Concern Freedom (USCIRF)-i report ka (ICC)-i metetdaksü. ajanga, Nicaragua nung tamangba yimsü temeden nung nüburtemi sorkar anema jenjang kanga mejungi kümogo, longkak sashia ait tenzükba ta shia U.S. Department of mapang nung Arogoi longkak State dang iba linük ya maneni aiter kaketshirtem aika Country of Particular Concern jenokdakja liasü, aser iba (CPC) nung züngoktsüla, ta mapang nungjagi Ortega aser mepishia liasü.

Murillo nati aniba sorkari 2019 küm Department of Arogo anema inyaker, Arogo State-i Nicaragua ya Special lenirtem apur mesüra Watchlist nung züngoka liasü bendangleni meindoker. aser 2022 küm nungbo CPC list nung züngok.

Tesüiba küm aika tsüngda Nicaragua nung tamangba iba linük nung Protestant yimsü temeden, meimchir Khristan nütsüng kanga temeden, democratic temeden renlokogo, ajisüaka linük aser yimsü temeden anema nütsüng shilem 30- Catholic inyakba agi UN nung mongin Khristantemi timtem ajangshir. telok kari iba linük aitsüba sülen 2018 küm longkak aitba taküm February ita nung mapang Arogo kari longkak parnoki U.N. Human Rights aiter kaketshirtem Council nungi aienshiogo. jenokdaksütsü telemtetba Nicaragua nung Khristan agiba sülen nungi Ortega- melungtet telok aika densema Murillo-i aniba sorkari Catholic melungtet telok aika Arogo anema inyaker. registration agentsüogo, talisa Nicaragua Tir Daniel Ortega Catholic Church indang aser pa kinüngtsü Rosario organization aika anentsüogo. Murillo nati aniba Sandinista

AO OSHI ANGAZÜKDAK:**TANÜ ANGAZÜKTSÜBA OJANG****Tepetep**

(adj) aritepa, kanga mazüng (hectic)

* Tanü tepetep mapang ka nung tangar kar kidangi aru.

Tepetshi

(v) manü aser shi melamelaa amenba, tetsürok masü (soft yam and cassava type edibles that are easy to cook)

* Manü tepetshi agi ngashi aon kanga junga soteter.



Tir Yimym

OLONG PAITEP # 7190

1		2			3		4		5
				6		7			
8									
						9			
			10						
11									12
					13			14	
15									
16							17		

TIPIEN

- Nüji masü - (4)
- Techinütsüka - (6)
- Aketa shirangba - (5)
- Pi - (6)
- Amena - (5)
- Kinü - (5)
- Tanang masü - (5)
- Lenmang - (6)
- Nübo tedi - (5)
- Tuoshi - (6)
- Shiruru apuba temenatsü - (4)

LANGTSÜNGLEN

- Jila tulu - (5)
- Sarasademdang tembang - (4)
- Tarutsü indang ashirtem - (6)
- Alia - (5)
- Mojing - (5)
- Tai inyakba metet - (5)
- Medemer chijiba - (6)
- Tatokba / Amadok - (5)
- Anüngdang masü - (5)
- Jabaso masü - (4)

OLONG PAITEP # 7189 TELANGZÜBA**TIPIEN :**

- Tesangra, 5. Mungo, 7. Kisen,
- Salem, 12. Semki, 14. Kilem,
- Kensü, 16. Sangpang.

LANGTSÜNGLEN :

- Temesen, 2. Raksa, 3. Aon,
- Aso, 6. Nile, 9. Alizüng,
- Omen, 11. Lemta, 13. Ola,
- Kin.

NAI-A YA METETTER MA**2025 KÜM TASH TASHI NUNG SEN TIMTIBA AAZÜKBA ENGLISH MOVIE 20:**

1	Ne Zha 2	\$1,899,346,459
2	A Minecraft Movie	\$954,411,390
3	Lilo & Stitch	\$911,067,423
4	Mission: Impossible - The Final Reckoning	\$540,784,468
5	Captain America: Brave New World	\$415,101,577
6	Thunderbolts*	\$381,317,318
7	Sinners	\$363,859,386
8	How to Train Your Dragon	\$359,739,485
9	Final Destination: Bloodlines	\$280,004,566
10	Snow White	\$205,679,463
11	Dog Man	\$145,270,808
12	Bridget Jones: Mad About the Boy	\$139,520,546
13	Mickey 17	\$131,847,147
14	The Accountant 2	\$102,123,366
15	Ballerina	\$100,784,337
16	Karate Kid: Legends	\$98,131,820
17	Detective Conan: One-eyed Flashback	\$96,987,407
18	The Amateur	\$96,000,836
19	A Working Man	\$88,000,711
20	The Monkey	\$68,869,853

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

Sharad Agarwal Mizoram DGP kümogo

Aizawl, Aami/June 24 (Agencies): Ministry of Home Affairs-i Hombarnü Arunachal Pradesh-Goa-Mizoram aser Union Territory (AGMUT) cadre indang 1997-batch IPS officer Sharad Agarwal, Mizoram indang Director General of Police (DGP) mapa abentsü atema shimogo.

Agarwal-i iba mapa ya Anil Shukla ken nungi agizükogo, shiba 1996-batch IPS officer ka lir. Shukla ya Delhi-i yokogo.

Ketdangsür anaprongla mapa tasen nung shimba aser transfer asüba osang ya Ministry-i Hombarnü metetdakja liasü.

Mizoram indang Director

**Sharad Agarwal**

General of Police (DGP) mapa magizük tsüngda Agarwal ya Delhi Police nung Economic Offences Wing Special

Commissioner of Police ama inyaka liasü.

Shukla, shibai Mizoram DGP mapa 2023 küm June ita Devesh Chandra Srivastava (1995 batch IPS) ket nungi agizüka liasü, pa Delhi-i meypa aotsü. Pa nem kechi mapa nongloktsü aji tang tashibo jangja mali.

Temetetsü kaji Mizoram Chief Minister Lalduhoma-ibo taoba mapang centre dang Director General of Police (DGP) mapa asoshi 1995-batch IPS officer David Lalrinsanga shimtsü atema mepeshia liasü, saka tang centre-i Sharad Agarwal ang shimogo.

Assam aser Manipur na tsüngda anentsüh agi NH-37 nokdanga ayu

Imphal, Aami/June 24 (Agencies): Taoba anogo ana tzünglu medangi aruba ajanga anentsüh aluba sülen Noney district nung Assam-Manipur National Highway nokdang aser gari senzügenpong nung tetsükdaksü adoka liasü.

Ketdangsürtemi ashiba agi, anentsüh aluba sülen NH-37 nung ghonda 8 shi gari senzügenpong mesüteti liasü. Iba lenmang yagi Manipur nung Jiribam district headquarters ajanger Imphal aser Silchar na sendakteper.

Mongolbarnü New Kaiphundai, Awangkhu, aser Makhuthong apu na tsüngda Luwangchum adser Ramchung yimtsüng nung tesem aika nung anentsü tulu aluba sülen gari

senzüsenpong nung tetsükdaksü ya adoka liasü.

Anentsüh aluba ajanga Silchar nungi Jiribam len nungi khu bener aruba garitem aser Imphal nungi Assam-i oya aliba garitem lenmang anatsülen senzügenpong mejungi ghoda 8 shi nokdanga liasü.

Ketdangsürtemi ashiba agi, anentsüh ya Mongolbar anepdang 3 ako shi nung alua liasü.

Ajisüaka lenmang yangluba aser yanglushiba company ABCI aser NHIDCL indang machinery temi lenmang nokdanga aliba Mongolbarnü 11 ako shi tashi nungbo mereteta liasü.

Police-i ashiba agi, anentsüh malu tsüngda tenügdakba osot

bena aliba gari 265 bo kecha tetsükdaksü makai otetogo.

Lendong ataloktsü ta temulung meleme bilemba tesemtem nung security dak sendakba nung jenjang tapet agiogo aser garitem kecha tetsükdaksü makai senzügenpongdaksütsü atema security convoy ka agüja liasü.

Sources-isa ashiba agi, tzünglu kanga sashia aruba ajanga Nambul aser Imphal ayong nung tzüshi alu aser iba sülen Imphal West district nung ketdangsürtemi nüburtem dang ayongküm nungi pila alitsü atema tekümdangtsü metetdakja liasü.

Taoba anogo ana tzüng kanga aruba ajanga state nung temperature-a tajemba kümér lir.

Assam: NIA-i ULFA(I) brigadier Rupam Asom puogo

Guwahati, Aami/June 24 (Agencies): National Investigation Agency (NIA)-i ULFA (Independent) brigadier Rupam Asom puogo shiba dang Kant Borah ta ajar. Pa ya iba ita tetenzüklen Assam nung Tinsukia police-i pua liasü.

Ketdangsürtemi ashiba agi, ken o bushisüngdangertemi taoba anogo asem tashi Guwahati anasa NIA indang Sonapur office nung telungpur lenir dang ya ken o balala ashishia arudar.

Nisung tepsetba, pur aoba aser Northeast India nung

telungpurtem inyaksangshi dak sendakba nung bushisüngdanga aliba nung Rupam Asom yagi tongtibang shilem agir.

Assam nung iba telungpur telok anema maneni jenjang agiba mapang NIA-i pa anema ken o aika benoker lir.

Rupam soter ken o ashishitsü atema temelaba anguba sülen taoba mapang ULFA(I) dak sendakba ken o tem aika lapokshi tenzükogo. Rupam Asom jenshia senzüba ajanga ken o bangdaka alibatam maneni asadangshi tenzükogo. Pa dang ken o ashishiba

ajanga ULFA(I) telung inyakyim, recruitment pipelines aser arrtsü adena inyaksangshibatam dak sendakba nung tongtibang osangtem aika jangja akümtsü ta security ketdangsürtemi amanger.

NIA-i pa koba ken o nung aija okadaki anir aotsü iba indang sangdonga mali, saka source temi taruba anogotem nung ken o balala maneni bushisüngdanga aotsü aser temzüng ozüng dak ajemdaker jenjang balala agitsü imlaba lemsatetpogo.



Guwahati, June 24: Assam nung Cachar Police-i June 24 nü ISBT, Silchar anasa ganja seret puogo. Osang tejangja angazükba sülen police-i Silchar Bypass nung tesem ka meita ao aser iba mapang ganja ya pua liasü.

Israel aser Iran ceasefire alitsü mulungtepogo



Tel Aviv, Aami/June 24 (Agencies): Iran aser Israel tsüngta anogo 12 anünglen nungi maktepba sülen ceasefire alitsü mulungtepogo.

Mongulbarnep Israel Ato Kilonser Benjamin Netanyahu-i sangdong ka nung, yasüng United States Tir Donald Trump-i rara anena atatsü proposal sangdongba nung Israel-i mulunger, ta ashi.

Aji masü dang Iranian state television-ia ceasfire tenzükogo ta sangdonga liasü.

Trump-i social media post ka nung ceasefire tenzükur ta shir mapang talangka melie Israel-i iba osang ya sangdonga liasü.

"Tang nungi ceasefire tenzükur. Imlibilema yangji aibelen tesü!" ta pai ashi.

Ceasefire nung aibelen nungbo Israel-i tashiyim agi telangzüba agütsütsü ta Netanyahu-i amokmerenaka, iba tezüngzüktep yagi anogo ishika kanga sashia akumba rara ajemtsü teimla sayur, kong US-i Iran indang nuclear facilities nung bomb pokloktsü aser Tehran-i Qatar nung US base ka maka liasü.

"Operation nükjidong nung takok anguba aser Tir Trump den angatettepa, Tiri linük ana tsüngta ceasefire alitsü benokba nung Israel-i

mulunger," ta pai ashi. Iran-i trokben missile khaloktsüba sülen Mongulbarnep nungi yimjung tenzükur ama ajiteter.

Trump-i sangdongba deadline (anepdang 7:30 ako) atongtsü lia amak, ta Iranian Foreign Minister Abbas Araghchi-i ashi.

"Israel-i tashiyim amshiba merenshitsü asoshi asen tashi tulu Armed Forces indang military operations ya minute tatembangba tashi liasü," ta pai social media nung ashi.

Iba mapang nisung kar tepset, ta emergency services aser Israeli military ajanga ashi.

Iba sülen mapang talangka melie Israel nunger dang missile shelters yutsür otettsü ta ashi aser iba sülen missile khaloktsüba osang mali.

Tehran nungi osangbener kati, Israel-i linük yimtiba nung amakba anena lir aser ibai ceasefire alitsü nükla tajung ka lir, ta ashi.

Ajisüaka tensa kanga ajungbo masü, kechiaser Israel ama Iran-ia par anema amakba tenzükshira meyipir amaktsü nangzüka lir, ta paisa ashi.

Par sorkari ceasefire alitsü mulungtepogo ta Netanyahu-i sangdongba sülen Israel opposition temi pa dang Gaza

nung Hamas den ita 20 raraba tembangtsü asoshi truce ka yanglutsü ayongzükur.

"Aser tang Gaza. Yangjia rara tembangtsü mapang lir. Pua bener aortem meyipa anir arung aser rara tembangang," ta opposition lenir Yair Lapid-i social media nung zülü.

Ajisüaka hardliners temi iba agreement aitsü aser Iran ya lendong aketba linük ka lir ta ashi.

Iran nung aliba regime ya agreements yanglutsüba regime masü saka akoktsüba regime lir, ta Netanyahu'er Likud party züngsem Dan Illouz-i zülua liasü.

"Mokokra, Iran-i Israel anema lenmang tasen bushitsü," ta pai sangdong.

Tehran ya nuclear nok-nü yangluba terenemer ta shia Israel-i June 13 nü Iran amak. Trump-ia kasaji ashiba sülen Honibarnü US-i amak.

Hombarnü United Nations nuclear watchdog IAEA ajanga Iran indang nuclear facilities jangjatepa tensa asadangtsü asoshi temelaba meshia liasü.

US-i Fordow, Isfahan aser Natanz facilities mamakdang Iran-i item tesemtem nungi nuclear osettem tesem balalai belener oa alitsü südi ta jembir.

Locals temi pua aliba sepai 57 tashi Colombian army-i chiokogo

Bogota, Aami/June 24 (Agencies): Colombia tenemlen alirtemi hopta tatemlen nungi pua yua aliba sepai 57 tashi military operation ka nung chiokogo, ta Colombian defence minister-i ashi.

Iba "Operation Justice" nung injang kata makhadok, ta minister Pedro Sanchez-i ashi.

Sepaitem ya Cauca region nung pua liasü, kong EMC rebel telok kanga tashi ita lir, shirnoki cocaine yangluba aser shibelenba mapa inyaker.

EMC ajanga sepaitep apu aser parnok apuba locals dang parnok yamaji inyaktsü totuyuba agütsü, ta Sanchez-i EMC tenüng asen.

Honibarnü EMC rebel südi ta temulung melemi alir ka apuba ajanga iba ya atalok, ta Colombian military ajanga ashir.

Sepaitemi temulung melemi alisang ya tenemlen nungi tayimtsü ajanga bener aotsü renemba mapang nisung 100 dak tema arua parnok lungbang.

Tasüngji yangji alir telok tuluba ka arua military unit tanabuba apu, ta Colombian army nungi General Erick Rodriguez-i ashi.

Locals temi security forces tem apuba ibai mezüngbuba masü saka tang ama sepai telok tulu taoba mapang mapu.

Tesüiba mapanga iba ama atalokdang locals temi humanitarian groups tem den jembia aser pua aliba sepaitem kanga kera chioka liasü.

Saka tang sepai 57 pua alirtemi shinga dena jembitsü memulung, anungji pua alirtem chioktsü mechi sepai tali yoksema liasü.

Hadir teperi bena aliba sepaitem tali yoksem aser nisung 20 apu, ta defence minister-i ashi.

Mitkar temi ashiba agi, iba tesem nung alir shilem 90 dak tema coca bushes lu ayimba nung metaloka alir, koba ajanga cocaine yanglur.

Anungji yangji sepaitem aliba ya parnok asoshi timtem ama ajiteter.

Bomb tetsükdaktsü: Trump-i Israel dang kumdangtsü ashir

Washington, Aami/June 24 (Agencies): US Tir Donald Trump-i Israel dang tekumdangtsü ashi aser Iran nung bomb mepokloktsütsü ajungshia liasü. Pa indang social media sapang Truth Social nung Donald Trump-i iba inyakyim ya aibelen tulu ta rateta ashi aser Israel dang par sentong tangsa anentsü ayongzüka liasü.

"ISRAEL. BOMBS TETSÜKDAKTSÜ. NAI IBAJI INYAKRA, IBAJI AIBELEN TULU ASÜTSÜ. NER PILOTS TEM TANGSANG KIDANGI ANIR ARUNG!" ta Donald Trump-i zülua liasü. Iba sülen US tiri Israel Ato Kilonser Benjamin Netanyahu den jembia liasü.

Mapang tatsüka lir post ka nung Donald Trump-i, "ISRAEL-i Iran mamaktsü-. Tayimtsü ajunga meyiptsü aser kidangi shilangtsü aser iba mapang Iran dang "Plane Wave" sayutsü. Shinga meyrutsü, Ceasefire tenzüka lir! Iba atema nenoki temulung agütsüba asoshi kanga pelar!" ta zülua liasü.

Donald Trump tetsüngtai ia jembizükba ceasefire ka linük anaprongi agizüktsü imla aliba mapang Tehran-i missiles khaloktsü aser ibaji Iran-i ceasefire nung tapi agi aibelenba lir aser tashiyim agi langzütsü, ta Israel-i sangdong.

Israeli Defence Minister Israel Katz-i sangdong tesashi ka agütsüba nung Iran-i tezüngzüktep raksar ta tai

tongloktsü aser "Iran-i ceasefire nung aibelenba nung tashiyim agi telangzüba agüja Tehran tiyong nung regime targets nung amaktsü ni Israeli army nem totuyuba agütsüogo," ta ashi.

Iran-i missile tasen mamshi ta shiaka Israel nungi iba telangzüba ya agütsü. Ceasefire maparen tenzükba sülen Israel tsütsü missiles kata me yok, ta Iran mitkar lenirtemi ashi.

"Tesüiba ghonda ishika tsüngta occupied territories (Israel) mimh Iran-i missiles mekhaloktsü," ta Iranian Army's General Staff ajanga ashi.

Israel nunger odang ajanga ashiba agi, nikongdang 7:00 ako (par mapang) tashi "test ceasefire" liasü aser iba mapang Israel military operations ajunga thinena liasü. Iran-i atsü-anem aka, Israel-i mapang talangba rara anena atatsü sangdongtsü imlar, ta Tel Aviv ajanga ashi.

Yamaji taitsüba liaka Iran-i mangatettep adoktsüsa mapa kecha meinyak ta ashir. Iran-i sangdong ka nung, Israel-i par sasa ceasefire sangdongba ya par tashi sayuba ajanga lir ta ashi. Supreme National Security Council ajanga ibai "divine victory" ta tenüng asang aser Iran mitkari 'pressure' agütsüba yong Israel-i sasa, tamakok agizüka aser par sasa tashiyim amshiba anentsüsa akum, ta ashi.

Iran sepaitem saksalema lir aser trigger nung temeyong inoka tashiyim mapa nung telangzüba tesashi agütsütsü renema lir ta ashi.

GOVERNMENT OF NAGALAND

DIRECTORATE OF SCHOOL EDUCATION

KOHIMA : NAGALAND

NO. ED/AEI-25/2021

Dated Kohima, the 24th June 2025

NOTIFICATION

In pursuance of Ministry of Education, Department of School Education & Literacy D.O. No.1-13/2025-NAT dated 23rd June 2025, the web portal for online self-nomination by teachers is open from 23-06-2025 and last date of submission is 15-07-2025. The condition of eligibility for consideration of National Teachers Award is **only regular Teachers and Heads of Schools with minimum ten years of services are eligible.**

In this regard, teachers who have contributed for the improvement of quality of education through their commitment and industry and also enriched the lives of their students can submit self-nominate themselves before the prescribed last date of submission. Further, details may be obtained from the **web portal <https://nationalawardstoteachers.education.gov.in>**

Hence, all DEOs/Sr. SDEOs/SDEOs are requested to ensure wide publicity in their respective jurisdictions.

(Shashank Pratap Singh) IAS
Principal Director

GOVERNMENT OF NAGALAND

DIRECTORATE OF TECHNICAL EDUCATION

NAGALAND: KOHIMA

Dated, Kohima, the 25th June 2025

NOTIFICATION

NO.DTE/ESTT-2/NEET/01/2024-25/In continuation of this office notification dated 19th May 2025, the NEET (UG)-2025 appeared candidates are hereby informed that the last date of submission of NEET(UG)-2025 application forms has been extended till **30th June 2025**, Officehours. No forms shall be accepted thereafter.

Further, the NEET-(UG) 2025 candidates are advised to defer from any kind of rumors and disinformation about NEET-(UG) 2025 merit list as the Department is still yet to receive the NEET-(UG) 2025 result officially from National Testing Agency / Ministry of Education, Department of Higher Education, Government of India, IITK Outreach Centre, Noida.

(ER. VIPULHOU LHOUNGU)
Director

NOA-i ayongzüka Olympic Day Run takok ngua agiogo



Dimapur, Aami/June 24 (TYO): Nagaland Olympic Association (NOA)-i ayongzüka June 23 nü Olympic Day nungdem nung Olympic Day Run kanga takok ngua ayongzüka agiogo. Iba sentong ya Indira Gandhi Stadium, Kohima nung agia liasü.

Olympic Day Run ya global omen "Move, Learn, Discover - Together for a Better World," nung ajemdaker agi, koba tanurtem fit süa toktsütsü, tembar yimteptsü aser Olympic tanüla jangrudaktsütsü nükjidong nung ayongzüka agiogo.

Olympic Day Run 2025 nung tanur arishi küm 8 nungi

12 tsüngda alir parnok 162-i shilem agia liasü. Tanurtem ya arishi küm tatakzü balala asemtepba nung shilem agi. Asemtepba telemsatem:

- o 50 meters - 8-9 years
- o 80 meters - 9-10 years
- o 80 meters - 10-11 years
- o 100 meters - 11-12 years

Iba sentong ya anepdang 8 ako nungi bibs lemja tenzük aser iba sülen 9 ako nung Nagaland Olympic Association, Senior Vice President T. Meren Paul-i asemtepba tenzüksü, shiba iba sentong mendenbuba liasü.

Iba sentong nung Department of Youth Resources & Sports, Government of Nagaland, Director Kethosituo

Sekhose alakteta jaoker liasü aser iba tanurtem aser sentepa aliba lokti ajungshia liasü.

Sempet lemtsüba sentong 12 ako nung tenzük aser iba sülen alakteta jaokeri tajungshi o jembi aser Nagaland Olympic Association (NOA) Assistant General, Joint Secretary Neivikuolie Nicholas Khatsu-i tepela o jembia liasü.

Olympic Day Run 2025 nung senpetajak senteper sen lakh 1 dak tema agüja liasü. Maneni Nagaland Olympic Association iba sentong nung shilem agir parnok 162 prongla, tsürapurtem, volunteer tem aser well-wisher ajak dang kanga pelaba lemsatepogo.

Seychelles National Day Boxing Tournament nung India-i medal 7 angu

Aami/June 24, 2025 (Agencies): National Day Boxing Tournament nung India nung asayartemi medal tenet ngua medal tally nung parnok temaba jenjang nung liasü. India nung asayartemi gold medal asem, silver asem aser bronze medal ka ngua liasü. Iba asayamung ya Mahe nung Hombarnü asayaogo.

Himanshu Sharma, Ashish Mudshaniya aser Gaurav Chauhan nungeri pei tata category nung gold medal angu aser Anmol, Aditya Yadav, aser Neeraj nungeria silver medal ngua liasü. Maneni Kartik Dalal-i bronze medal ka ngua liasü.

Sharma-i gold medal ya 50Kg asaya nung angu aser Mudshaniya-ia 55Kg category asaya nung gold medal ngua liasü. 55 Kg category asaya nung Chauhan-i kanga junga asayaba sülen paia gold medal nguogo.

60Kg category asaya nung Anmol-i silver medal angu aser Yadav aser Neeraj natia 65Kg

aser 75Kg category asaya nung final mekotteti silver dang ngua liasü. Dalal-i bronze medal ya 70Kg category nung angu.

Neeraj shibai National nung silver medal ngua liasü, pai 75kg event nung tanabuba round nung RSC agi asaya koka liasü.

Haryana nungi Himanshu Sharma, shiba taoba Belgrade Boxing champion aser 6th Elite Nationals nung bronze medallist lir, pai 50kg section nung Mauritius nung asayar Mathieu Soupprayen 4-1 agi koka final-i ai aser final nung pa den asayatsü alisang walkover achiba sülen pai asaya akok.

Ashish Mudshaniya, shibai maneni kanga junga asaya arudar pai 55kg category nung Mauritius nungersa Guillaume Francis 4-1 agi koka gold medal ngua liasü.

Haryana nungi Anmol, shibai 55kg event semifinal nung Seychelles nung Dario Gabriel 4-1 agi koka liasü, pai final nung takok monguteti silver medal dang angu.

Man Utd-i striker Mbeumo atema £60m bid asü



Aami/June 24, 2025 (Agencies): Manchester United-i Brentford striker Bryan Mbeumo atema jenjang yanglushir pound million 60 bid süogo.

Iba ita United-i arishi küm 25 tain asayar atema ya pound million 45 den pound million 10 add-ons bendenloker bid asü saka magizük.

Cameroon nung forward shiba club-i taküm lemluwa alzüka tanabuba asayar tanabuba akümtsü lir, pa dak sendakba nung sensaksem iba hopta maneni agitsü.

Wolves nungi Matheus Cunha pound million 62.5 agi alizükba sülen, July 7 nü nungi pre-season training metenzük tsüngda United puri Ruben Amorim-i aniba team ya tashi istishidaktsütsü atema merangdar.

Tottenham manager tasenba Thomas Frank-i Mbeumo alizükba liasü aser tanga Champions League club temia

pa alizüktsü tejangraba aliba sayuogo.

Sources balalai ashiba agi, asayar ya ayoktsü atema memulung tsüngda Cunha atema Wolves nem taah agütsüba kasa Brentford-ia aginütsü. Mbeumo Brentford den tenangzüktepba yanglur aliba tembangtsü atema ano küm ka anunga lir.

Mbeumo-i taoba season Brentford atema goal 20 idaktsü aser assist teku süja liasü.

United goalkeeper Andre Onana aser Mbeumo naprongla Cameroon nungi lir. Pa club-i alizükkyonga 2025-26 campaign nung hopta pezübo masayatetsü, kechiyong pa Morocco nung Cameroon tenüng nungi Africa Cup of Nations nung asayatsü.

Cameroon team December 24 nü mezüngbuba asaya Gabon den asayatsü.

Alejandro Garnacho tarutsü mejangjai aliba mapang ka nung tang asendenshir Mbeumo alizüktsü atema jenjang agiogo.

Lalit Upadhyay international hockey asaya nungi anisüngzüker



Aami/June 24, 2025 (Agencies): Olympic nung medal ana tashi ngur aliba India nung forward Lalit Upadhyay-i pa international hockey asaya nungi anisüngzüka sangdongogo. Deobarnü 4-3 agi Belgium koka India team FIH Pro League season tembangba sülen pai iba osang sangdonga liasü.

Lalit-i pa international hockey asaya nungi anenba osang ya June 23 nü Olympic Day amungba mapang sangdonga liasü.

Pai Olympic nung medal ana anguba den continental asayamung balala nung takokba balala anguba aser India tenüng nungi 180 ben asayaba sülen asaya nungi anenogo.

Arishi küm 31 taina sayar yagi iba telemtetba agiba ya social media sabang balala ajanga sangdonga liasü.

"Ni international hockey asaya nungi anisüngzüka tanü sangdonger. Iba ya temela masü saka asayar ajaki künübo ajangshitsü. Linük tenüng nungi

asayatsüji kü taküm nung tetushi aser konang tulutiba liasü. Ajak atema kanga pelar," ta Lalit-i pa indang official X handle nung zülutsü.

Lalit ya Uttar Pradesh kübok Varanasi nungi lir aser pa India team nungi mezüngbuba 2014 küm asaya aser pa ya India nung field hockey asayartem rongnungi takok tajungtiba anguba asayar ka aküm.

India team-i 2016 aser 2018 küm Asian Champions Trophy nung gold medal anguba aser 2017 Asia Cup akokba mapang pai tongtibang shilem agi. Paisa, 2017 World League Final (bronze) aser 2018 Champions Trophy (silver) nunga India team nem teyari tulu agüja liasü.

National team nungi küm ter dak tema asayaba mapang pai asaya 179 nung goal 40 dak tema idaktsüogo.

Olympic nung India team-i Tokyo aser Paris na nung bronze medal anguba mapang Lalit-i tongtibang shilem agia liasü.

Pai takok tajung ngua asayaba atema Lalit nem 2021 küm Arjuna Award agütsüogo. Pa ya 2022 küm nungi Uttar Pradesh Police nung Deputy Superintendent of Police ama inyakdar.

BILEMDANGANG

"Mapa tasen ka angazüktsü atema kecha temonu mali."